

四願經

吳月支國優婆塞支謙 譯

聞如是一時佛在拘夷那竭國與五百比丘僧俱坐於尼延樹下爲數千萬人說法於是城中有豪長者財富無數名曰純陀純陀有子厥年十四時得重病不免所疾遂便喪亡父母兄弟宗親中外莫不愛重啼哭憂愁安可言也是時純陀聞佛來化心大歡喜便告其妻言今佛在此宜當往見其有聞佛說經法者莫不開解忘憂除患即與其妻宗親僕從俱到佛所爲佛作禮却坐一面長者純陀長跪叉手白佛言人在世間積聚錢財思慮勤苦不敢衣食不知布施奉持經戒無尊無卑誰得如願者或時命盡父母兄弟妻子親屬啼哭愁毒爲其棺殮遺送財寶衣被飯食

寧有益於死者不佛告純陀及諸弟子聽我所說善思念之純陀眷屬諸會弟子皆各叉手一面受教而聽佛言人有四願不可常保何等爲四第一願者是人身沐浴莊飾飯食五樂常先與之疾病卒至不能止之命盡軀僵在地不隨人魂神去空愛重之復何益也第二願者謂財產官爵俸祿得之者喜不得者愁疾病已來死至命盡所有財物官爵俸祿故在世間不隨人神魂去空爲愁苦第三願者謂有父母兄弟妻子中外親屬朋友知識恩愛榮樂疾病死至命盡復不能救我命亦不能隨我魂神去空啼哭送我到城外深塚間以棄我去各自還歸雖相追念愁苦憂思不過十日諸家宗親男女會聚相向歌舞快共飲食相對談笑捐忘死人雖有父母兄

弟妻子中外親屬朋友知識不能共追還我命空悲之何益第四願者是人意天下人少有能守護其意者皆放心恣意姪於五樂貪利嫉妬忿怒鬪諍不信道德至於身死壽盡魂神意三相追逐不得相離譬如雀飛意隨其兩翅意爲身神兩翅爲魂魄人不能守護其意從惡意所爲殺盜貪姪以生時所爲罪死入太山地獄中爲餓鬼罪竟或出爲畜生當爲人所屠割作人放心快意故入三惡道佛告純陀及諸比丘當端汝心守護汝意諦自思惟知身非我身所有財物非我許當諦計校所有父母兄弟妻子五種親屬朋友知識官爵俸祿念欲得之無有厭足謂有益於我身老病死來皆不能益於我身亦不能爲我却之人不能自拔爲道如鵲鳥愛其尾尾

爲射獵者所得賢者諦知是四願不隨人魂神去空爲之困苦因拔恩愛之根絕三惡道得三善道一者不復老二者不病三者不死堅守汝意乃可得度諸弟子聞歡喜前爲佛作禮佛念天地八方之外萬物受性皆懷憂苦常傷人民含血蠕動不得自在與天爭命皆當歸死骸骨銷爛下入于土精神飛翔展轉五道爲善上天爲惡入淵凡人生時所爲善惡精神魂魄隨其殃福生時爲人孝順父母忠信事君死得上天如世間人積德爲善仕宦求官位至公侯豪貴富樂貧賤困厄皆由宿命行伐殺酷虐生爲惡人死受重酬自爲心侯主招百凶快心之歡必有後患帝王人民俱惑於道寄託父母作善福壽爲惡貧苦盜竊欺人負債不償借貸不歸死後當爲

奴婢牛馬或作大豬屠割剥其軀稱賣償人
 作人慳貪不肯布施死爲餓鬼不得衣食如
 乞匄人以刀截肉叩頭求食此皆先時爲人
 貪殘悖逆不信爲善傷殺盜竊受人婦女讒
 言兩舌飲酒鬪亂死入地獄掠笞燒煮身更
 蔓毒苦痛無極人有六憂三苦四痛佛戰轉
 化生死不絕棄國捐王求自然道積德累歲
 乃得道真神明徹照悉見天地絕洞之外知
 人鳥獸蟲豸所言心所趣向佛念人死如大
 風卒至無期人死至無時當與心爭諍爲善
 勿疑佛以經道勸勵賢者目所不見耳所不
 聞崛奇珍寶何益於已諸爲道者當信經戒
 守善以死不犯惡生道不可失德不可離遠
 道失德如兒生無母魚脫於淵人死復生如
 蠶渾沌繭中穿絲出飛其神故一變形易殼

道成於微五戒得根弟子聞經歡喜前受教
 是爲痛痒要識如諦知也何等爲思想識爲
 身六思想眼裁思想耳鼻口身意裁思想如
 是六思想何等爲思想習識裁習爲思想習
 如是爲思想習識何等爲思想盡識裁盡爲
 思想盡識如是爲思想盡識何等爲思想盡
 受行識是爲八行識識識諦見到諦定意
 爲八如是盡思想受行識何等爲思想味識
 所爲思想因緣生樂得意喜如是爲思想味
 識何等爲思想腦識所爲思想不常盡苦轉
 法如是爲思想腦識何等爲思想要識所思
 想欲貪能解欲貪能斷欲貪能自度如是爲
 思想要識何等爲生死識爲六身生死識眼
 裁生死識耳鼻口身意裁行如是爲生死識
 何等爲生死習裁習生死習識何等爲生死

盡識裁盡爲生死盡識何等爲生死欲盡受
行識爲是八行識諦見至諦定爲八如是爲
生死欲滅受行識何等爲生死味識所爲生
死因緣生樂喜意如是爲生死味識何等爲
生死腦識所有生死不常盡苦轉法如是爲
生死腦識何等生死要識所爲生死欲貪隨
欲貪能斷欲能度如是爲生死要識何等爲
識身六衰識眼裁識耳鼻口身意裁識如是
爲識識何等爲識習命字習爲識習如是習
爲識何等爲識盡爲識命字盡爲盡識如是
爲盡識何等爲識盡受行爲識八行諦見至
諦定爲八如是爲識盡欲受行如諦識何等
爲識味知所識因緣故生樂生喜意如是爲
味生爲味識知何等爲識腦識所識爲盡爲
苦爲轉如是爲識腦識何等爲要識所識欲

貪能活欲貪能斷能度如是爲要識如是比
丘七處爲覺知何等爲七色習盡道味苦要
是五陰各有七事何等爲三觀識亦有七事
得五陰成六衰觀身爲色一觀五陰爲二觀
六衰爲三故言三觀比丘能曉七處亦能三
觀不久行墮道斷結無有結意脫黠活見道
見要一證受止已斷生死意行所作意不復
來還生死得道佛說如是比丘歡欣受行

四願經